

### **Кондак 1**

Избранной от всех родов Пречистей Деве Владычице,  
источающей неоскудныя милости всему миру и сугубо стране нашей  
Российстей; похвальна восписуем о Ея чудесах, явлениях и  
чудотворных иконах. Ты же, Обрадованная, не отрини наших  
песнопений, но приеми их и подаждь радость нам, зовущим Ти:

Радуйся, Пречистая Дево, всемирная Славо и Радосте!

### **Икос 1**

Архистратиг Михаил и вся небесныя силы песнословят Тя,  
Владычице, Честнейшую Херувим и Славнейшую без сравнения  
Серафим, сущую Богородицу; и мы грешни на земли, подобяся сим  
безплотным силам, и радуяся первым глаголам радости,  
принесенным Тебе Архангелом Гавриилом и праведною Елисаветою,  
купно с ними из глубины сердца нашего вопием Ти:

Радуйся, благодатная;

Радуйся, яко Господь с Тобою.

Радуйся, Благословенная в женах;

Радуйся, обретшая благодать у Бога.

Радуйся, яко Дух Святый найде на Тя, и сила Вышняго осени  
Тя;

Радуйся, заченшая во чреве, рождшая Сына и нарекшая имя  
Ему Иисус.

Радуйся, яко рожденное Тобою Свято есть и наречеся Сын  
Божий;

Радуйся, яко благословен Плод чрева Твоего.

Радуйся, Мати Господа нашего;

Радуйся, веровавшая, еже совершился глаголенным ти от  
Господа.

Радуйся, яко возрадовася при сих приветствиях дух Твой о  
Бозе Спасе Твоем;

Радуйся, Пречистая Дево, всемирная Славо и Радосте!

### **Кондак 2**

Разум человеческий не может постигнути, како Сам Господь  
вселился в девственную утробу Твою и како Ты пребыла еси Девою  
и по рождестве Сына Твоего, преклоняяся пред велиею тайною  
воплощения Бога Слова, радостно вопием Тебе, заимодавшей Ему  
плоть Твою, питавшей Его млеком и носившей Его руками Своими,  
Ангельскую песнь: Аллилуия.

### **Икос 2**

Во вся дни жития Твоего на земли от сретения Тобою во  
храме праведного Симеона, прорекшаго Ти, яко оружие пройдет  
душу Твою. Всякая в мире сама радость вся печали бысть  
причастна, до утра первого дне по субботе, егда, Ты паки  
услышала глас Ангела, рекшаго Тебе: «Радуйся, Благодатная,  
Твой Сын воскресе тридневен от гроба.» И мы с сим радостным  
гласом приносим Ти хваления наша:

Радуйся, Прародительнице вечнаго Царя;

Радуйся, израстившая нам плод живота.

Радуйся, верная раба Господня;  
Радуйся, яко блажат Тя вси роди.  
Радуйся, всех нас при кресте Сына Твоего усыновившая;  
Радуйся, всегда матернюю любовь к нам являющая.  
Радуйся, веры христиан вожделенная Помощнице;  
Радуйся, яко за всех молиши Сына Твоего Христа Бога  
нашего.  
Радуйся, Присноблаженная и Пренепорочная;  
Радуйся, во славе небесной одесную Бога пребывающая.  
Радуйся, чистотою сияющая паче солнца;  
Радуйся, Пречистая Дево, всемирная Славо и Радосте!

### **Кондак 3**

Како многообразно Ти, Пречистая Владычице, укрепляла еси род человеческий в вере в Бога и Сына Твоего? Колико даровала еси Ты нам чудотворящих икон Твоих? Коль множицею Ты являлась и въявь и в сонниих подвижником благочестия? Кто может исчислити вся чудеса Твоя? Кий глагол может вознести Тебе достойную похвалу? Кто не ублажит Тебя, Пресвятая Дево? Кии уста умолчат, егда о Тебе радуется, Благодатная, всякая тварь, Ангельский собор и человеческий род! Не умолчим и мы никогда, Богородице, силы Твоя глаголати недостойнии, и вопием о Тебе Богу: Аллилуия.

### **Икос 3**

Святии Игнатий Богоносец и Дионисий Ареопагит, взирающе на Тя, Пречистая Владычице, не обретоша словес описати Твой сияющий лик, и Твою Божественную благодать и силу, и паства их сокрушающееся, яко не вси возможоша зretи тя, Небесная Дево. Ты же от любви к верующим в Сына Твоего повелела еси Святому Апостолу и евангелисту Луце изобразити образ Твой честный с Богомладенцем и Сыном Твоим, да вси языцы и колена земная, взирая нань, имут во вся веки возноситися мыслию к Самой Тебе, Преблагословенная Владычице: и мы грешнии, преклоняюще колена пред сим образом, взвываем Ти, Всепетая:

Радуйся, рекшая к сему первописанному образу: «С ним  
благодать Моя и сила пребудет»;

Радуйся, даровавшая его стране нашей Российской во град  
святый Владимир.

Радуйся, яко днесь сим образом светло красуется  
славнейший град Москва;

Радуйся, сию иконою благодать и милость нам сугубо  
дарующая.

Радуйся, чудотворно изобразившая Лик Свой во храме Твоем  
во граде Лиде;

Радуйся, Апостолов и всех верных сим чудом обрадовавшая.

Радуйся, поклоняющимся Тебе пред сим образом чудеса  
источившая;

Радуйся, научившая Апостолов взвывать к Тебе: «Пресвятая  
Богородице, помогай нам!»

Радуйся, посетившая при жизни Твоей на земле Святую гору  
Афонскую и избравшая сие место в удел Свой;

Радуйся, пославшая равноапостольную Нину просветити

жребий Твой земной, страну Иверскую.

Радуйся, светлое пророческое сбытие и Апостолов похвало;

Радуйся, Пречистая Дево, всемирная Славо и Радосте!

#### Кондак 4

Егда враг рода человеческаго возведе на христиан гонения и предаде телеса верующих на мучения и смерть, колькраты являлася еси Ты Укрепительницей их в сем подвиге, Наставницею в вере Христовой, Подательницею им силы и премудрости. И ныне сии Святии мученицы, претерпевши велия мучения, Христовы невесты: Екатерины, Варваро и иныя, сопутствуют Тебе в Твоих посещениих избранников Божиих на земли, и вопиют о Тебе Богу песнь: Аллилуия.

#### Икос 4

Благоверный и равноапостольный князь Владимир, приведый ко Христу людей земли Российской, по крещении Своем сооруди первый храм во граде Киеве в честь Пречистаго Рождества Твоего, Владычице мира, и даяше десятину стяжаний Своих на украшение Его. И от тех дней до ныне Ты, Преблагословенная, изливаеши неустанно сугубую благодать над страною нашою и даруеши ей велия милости Твоя. И яко особый дар Твоего благоволения и Твоего избрания града Киева в удел Себе, чудесно даровала еси ему чудотворный образ Успения Твоего и повелела еси соорудити Тебе храм во обители Святых Антония и Феодосия. Кто изочтет множество людей, кои преклоняху со слезами колена своя пред Пречистым образом сим? Кий град и кая весь не ведят о сих многочудесных образе и обители? Кто повесть всяя чудеса, у сего образа явленныя? Не таим Твоих благодеяний, Пречистая, и мы, со умилением взвываем Ти:

Радуйся, Обрадованная, во успении Твоем нас не оставляющая;

Радуйся, восприемлемая от земли дланьми Сына Твоего.

Радуйся, ко превышним возшедшая, наслаждаеши славы Его;

Радуйся, уверившая чрез Апостола Фому о Твоем с плотию на небеса восхождении.

Радуйся, престоле Господень огнезрачный, вознесенный от земли в Царствие Небесное;

Радуйся, в видении показавшая образ великий Церкви Киево-Печерских.

Радуйся, Сама давшая моши Святых мучеников и злато для созидания ея;

Радуйся, вручившая и Святую икону Успения Твоего Своими руками Святым здателям.

Радуйся, чудеса показавшая на месте храма Твоего, с огнем небесным очистившая место сие;

Радуйся, Ангелоподобное пение иноков похвалы пред Твою чудотворною иконою «Успения» приемлющая.

Радуйся, скорбь всех притекающих к Тебе в радость претворяющая;

Радуйся, пречистая Дево, всемирная Славо и Радосте!

### **Кондак 5**

Видяще, Всенепорочная, с высоты небеснаго жилища Своего, идеже с Сыном Твоим во славе пребываеши, скорбь рабов Твоих во граде Казани, яко гневнаго ради Божия посещения вера Христова поругана бысть агарянским зловерием, — благоволила еси явити икону Свою чудесы ю прославляющи, да утверждаемы знаменьми Твоя благодати, христолюбивые люди верно вопиют Тебе: Радуйся, Заступнице усердная рода христианского, и Творцу всех Богу: Аллилуиа.

### **Икос 5**

Хотяши явити токи чудес всем скорбящим, печальным, обидимым и заблудшим, даровала еси, Всемилостивая Владычице, сугубую благодать Твоим чудотворным иконам, именуемые: «Всех скорбящих Радосте», «Утоли моя печали» и «Взыскание погибших». Кое море слез пред ними пролито в скорбех и печалех сущими? Кая душа не притекала к Тебе в житии своем, припадающе к сим иконам Твоим? Чьи скорьби ты не претворила еси на радость? Кому из погибающих, но молящихся Тебе, Ты не простерла еси руку помоши? Благодарим Тя, Всепетая, за вся милости, грешному роду человеческому дарованные, и всею душею вопием Ти умильно:

Радуйся, благодатная Богородице Дево, всех скорбящих радосте;

Радуйся, Мати милосердия.

Радуйся, скорая Помощница сущим в бедах и напастех;

Радуйся, Радосте наша, избави нас от всякаго зла и утоляющая наша печали.

Радуйся, Твоим представительством временная наша скорби разрушающая;

Радуйся, явлением икон сих знамения благодати в Церкве являющая.

Радуйся, сими яко столпом огненным, мрак греха отгоняющая;

Радуйся, прославившая икону Твою, именуемую «В скорбех и печалях утешение».

Радуйся, восхваляемая в обителех на Афоне и в земли нашей пред образом Твоим «Отrado и Утешение;

Радуйся, Пречистая Дево, всемирная Славо и Радосте!

### **Кондак 6**

Всем верным утешительно есть взирати на икону Твою, нареченную Тобою «Скоропослушница», поклонятися Тебе пред Нею, не токмо во обители Дожиарстей, но и во многих градех и весех страны нашея, взвывая Ти: Радуйся, Всеблагая Скоропослушница, прошения наша во благо исполняющая, и поя со умилением сердечным Сыну Твоему, Христу Богу нашему: Аллилуиа.

### **Икос 6**

Сила Вышняго осеняет с верою и благоговением прибегающих к Твоему Всечестному Покрову, Пречистая Владычице, и от лет древних до ныне Ты покрываеши Своим омофором весь род

христианский, и наиначе страну нашу Российскую, и многия обители в ней созданныя. И люди православныя, взирающе на Твою икону, на Ней же Ты со Архангелы, Ангелы, Предтечею, Иоанном Богословом и всех Святых лицом ходатайствуши о нас пред Господом, преклонше колена и главы Своя, взывают Ти умильно:

Радуйся, Радосте наша, покрывающая нас от всякаго зла честным Твоим омофором;

Радуйся, святых обителей Христовых Покров и спасение.

Радуйся, Святых храмов и алтарей первейшее украшение;

Радуйся, благословение домов и семейств благочестивых.

Радуйся, верных пастырей Церкви бодрость и вразумление;

Радуйся, богообязненных иноков и инокинь наставнице.

Радуйся, явных подвижников благочестия явное укрепление;

Радуйся, тайных среди мира рабов Божиих тайное вразумление.

Радуйся, и нас обнаженных добрых дел не оставляющая Своим Покровом и благодатию;

Радуйся, крепкая Заступнице сущих в плену и изгнании.

Радуйся, неусыпающая попечительнице во узах и темницах седящих;

Радуйся, Пречистая Дево, всемирная Славо и Радосте!

### Кондак 7

Видяще рыбарие над пучиною вод носимую невидимою силою и светом подобно солнцу сияющую Твою, Богомати, Тихвинскую икону, возопиша ко Господу: «Яви нам сей Божественный дар; не скрый сокровища, имже надеяжомся душевную нищету нашу обогатити: отри слезы и рыдания наша»... и получив желаемое, вси возопиша Тебе, Пречистая: «Радуйся, Владычице, милостивая о нас пред Богом Заступнице», Сыну же Твоему и Богу поя песнь Ангельскую: Аллилуиа.

### Икос 7

Кий верный, посетив град Москву, не поклонится, Госпоже Богородице, пред Пречистыми иконами Твоими «Иверская» и «Боголюбивая»? Кто не умилится, видя в полуночи множество людей, коленопреклоненно сретающих Твою «Иверскую» икону? Кто изочтет день и ночь лобызающих во дни празднества Твой «Боголюбивый» образ? Не отступи от нас во вся дни нашей жизни, Мати Всемилостивая, и услыши наше пение Тебе приносимое:

Радуйся, Благая Заступнице, двери райских нам отверзающая;

Радуйся, яко вси благовейные люди Московстии пред Пречистым Твоим «Иверским» образом.

Радуйся, яко день и ночь Твоя икона сия приносится в дома скорбящих и болеющих;

Радуйся, яко чудодействовавшая сим образом еще на пути Его с Афонских гор в землю Российскую.

Радуйся, повелевшая благочестивому Мануилу дати выкуп неверным, возбранявшим шествие Святая иконы в страну Русскую;

Радуйся, яко после же сугубо ему сей выкуп отдавшая.

Радуйся, яко и многия списки и с иконы сея прославившая великими чудесы;

Радуйся, Боголюбивая Царице Богородице, Надеждо и  
Прибежище наше.

Радуйся, явившаяся князю Андрею, рекшая волю Твою и на  
месте явления Твоего повелевшая соорудити обитель иноческую во  
имя Рождества Твоего;

Радуйся, изображенная на иконе Твоей, еже во граде  
Москве, с первосвятителями Московскими, блаженными, преподобными  
и мученицами.

Радуйся, прославившая чудесы Своими «Боголюбивая» иконы  
во градех Угличе, Туле и инех;

Радуйся, Пречистая Дева, всемирная Славо и Радосте!

### **Кондак 8**

Возсия нам, яко пресветлая заря, чудотворная икона Твоя  
«Нечаянная Радость», пред Нею же людие во гресех, бедах,  
скорбех и озлоблениих суще, многажды с верою в молитве колена  
преклоняют, взывая: Радуйся, нечаянную радость верным  
Дарующая, и получившя милость Твоя, вопиют о Тебе Богу:  
Аллилуиа.

### **Икос 8**

Благовестник Твой Архангел Гавриил по Божию повелению  
дивным явлением научи нас на земли восхваляти Тя такожде, яко  
же Ангели воспевають Тя на небеси, даровав песнь сию: Достойно  
есть яко воистину блажити Тя Богородицу, Присноблаженную и  
Пренепорочную, и Матерь Бога нашего. И мы от дней тех, взывая  
Тебе выну, Всепетая, сию, Ангелом принесенную, песнь, взываем  
Ти такожде:

Радуйся, христианом Помощнице и милосердая о грешных  
Предстательнице;

Радуйся, превысшая всех сил Небесных.

Радуйся, даровавшая Святей горе Афонстей, чрез многия  
иконы Твоя, чудотворения, благословения и вразумления;

Радуйся, пророчество святаго Саввы Освященного чрез икону  
Твую «Млекопитательница» исполнившая.

Радуйся, моления иноков Афонских пред образом Твоим  
«Предвестительница» и изобилие елея для храма Своего  
давшая;

Радуйся, игуменство в Хилендарском монастыре иконою Твоею  
«Троеручица» приявшая.

Радуйся, восхваляемая пред образами Твоими «Вразумившая  
эклесиарха» и «Герондиса», еже есть старица;

Радуйся, именуемая «Акафистная», рекшая от иконы Твоей  
старцу, чтущему Ти акафист: «Радуйся и Ты, старче Божий».

Радуйся, икону Свою «Одигитрия» чудесно преносившая  
дважды из обители Ватопедской во обитель Ксенофонтскую;

Радуйся, дивная чудеса явившая на Афоне от икон  
«Закланная» и «Ктиторская».

Радуйся, дщерь царя Плакидию воспитавшая, яко жену, от  
посещения обителей Афонских и милостиво ей сей грех  
оставльшая;

Радуйся, Пречистая Дева, всемирная Славо и Радосте!

### **Кондак 9**

Во дни Светлых Пасхи, егда Церковь радостно поет о Воскресении Христовом, воспоминаем мы, Пречистая, и о Твоих чудесех, ихже ради написашася иконы Твоя «Живоносный Источник» и «Прозрение очес» и чудесно сохранися от рук иконоборца Твой образ «Сладкое лобзание», и благодаряще Воскресителя душ и телес наших, поем Ему радостно песнь: Аллилуиа.

### **Икос 9**

Витии многовещании не возмогут при всей любви к Тебе, Владычице, достойно наименовать Ти, Пречистая, и от избытка сердца именуют иконы Твоя многими радостными именами, каковыя приими и от нас ныне:

Радуйся, «Цвете Неувядаемый» и «Благодатное Небо»;  
Радуйся, «Блаженное чрево» и «Звездо Пресветлая».  
Радуйся, «Радосте ангелов» и «Три радосте»;  
Радуйся, Милостивая и «Милующая».  
Радуйся, «Недремлющее око» и «Подательнице ума»;  
Радуйся, «Призри на смирение» и «Ключу разумения».  
Радуйся, «Умягчение злых сердец» и «Спасительница утопающих»;  
Радуйся, «Непорочная Дево» и «Помоще в родах».  
Радуйся, «Споручнице грешных» и «Целительнице»;  
Радуйся, «Слово плоть бысть» и «Прежде рождества и по рождестве Дево».  
Радуйся, «Всеблаженная» и «Седмистрельная»;  
Радуйся, Пречистая Дево, всемирная Славо и Радосте!

### **Кондак 10**

Проповедит Новград преславное заступление Твое, Пречистая Владычице, како во дни нашествия врагов сильных и вооруженных, от Твоей святыя иконы «Знамения» помощь Твою благодатную людем Твоим явила еси, враждебные полки со страхом вспять обративши, град же Твой цел и невредим от них сохранише; да вси вопиют благодаряще Тебе: Радуйся, Владычице, знамение милости Твоей нам являющая, и Спасителю Богу поя: Аллилуиа.

### **Икос 10**

Силою Всевышняго действующи, Владычице Преблагая, силу естества огненного укрощаеш Святою иконою Твою «Неопалимая купина» и многия чудеса содеваеш ею во Вселенней. Такожде исчести не может разум человеческий всех благодеяний Твоих источаемых от чудотворных икон Твоих, иже пребывают на Почаевской горе, в Ченстохове, в вези Ахтырки, от именуемых «Феодоровская», «Толгская» и иных, ихже не леть есть воспомянути. Не таим Твоих благодеяний, Всеблагословенная, и в радости сердечной вопием Тебе сицевыя хвалы:

Радуйся, Благодатная Купино неопалимая, огненного запаления нас избавляющая;  
Радуйся, Похвало Почаевская, надеждо наша и утешение.

Радуйся, Мати Божия, Предстательнице и Заступнице наша усердная, даровавшая нам икону «Обнорскую»;

Радуйся, Софие, еже есть Премудрость Божия, создавшая Себе храмы во градех: Киеве, Новеграде и иных.

Радуйся, чудотворно окончившая писание иконы Твоей «Знамение» в Серафимо-Понетаевской обители;

Радуйся, во Святую Киево-Братскую обитель в чудотворней иконе Своей «Киево-Братской» пришедшая и до сих пор в ней пребывающая.

Радуйся, обитель инокинь собравшая окрест Твоей чудотворных иконы, яже в «Козельщанах»;

Радуйся, даровавшая во утешение градем Одессе и Херсону, икону Твою «Касперовскую».

Радуйся, освятившая град Вильну образом Твоим «Остробрамская». Пред ним же всяк благочестивый преклоняет колена своя;

Радуйся, «Нерушимая стено» и «Спорительнице хлебов».

Радуйся, «Взыгание» и «Плачущая»;

Радуйся, Пречистая Дево, всемирная Слава и Радосте!

### **Кондак 11**

Благочестивые пастырие и людие всякую седмицу восхваляют Тя, Пречистая, яко «Одигитрию» — Путеводительницу; и несть кому исчислити Твоя иконы сии по всем странам христианским Тебе, Пречистая, сооруженныя. Наипаче других восхваляет Тя благодарный град Смоленск, его же спасла еси от ига татарского, давши дивное повеление гласом Твоим воину Меркурию сразиться со врагом; да всяк язык взвывает Тебе: Радуйся, Всеблагая Одигитрие, всемирное чудо и слышание, и поет Сыну Твоему хвалебную песнь: Аллилуиа.

### **Икос 11**

Кий глас изобразит радость избранныков Божиих, егда Ты по любви Своей к ним являлася еси им на земли, укрепляя, утешая и наставляя. В тии часы небо соединяющееся с землею, и свет, паче солнечного, осияваше убогия келлии преподобных. И мы грешни, воспоминая сие и причащааяся духовной сей небесной радости угодников Божиих, во смирении вопием Ти:

Радуйся, повелевшая Богослову преподати учение о Святей Троице Святителю Григорию Неокесарийскому;

Радуйся, наставившая в Гефсимании преподобного Досифея на пост и молитву, и призывавшая его во иночество.

Радуйся, спасшая ученика преподобного Павла Препростаго от адских мучений, дважды явившися преподобному и научивши Его молитве об усопших;

Радуйся, обрадовавшая Косму Маюмского, рекши ему, коль приятна Тебе составленная им песнь: Честнейшую Херувим и Славнейшую без сравнения Серафим.

Радуйся, со апостолы Петром и Иоанном яве посетившая преподобного Сергия Радонежского и ученика Его Михея;

Радуйся, многажды являвшаяся преподобному и Богоносному Серафиму Саровскому и давшая ему повеление об устройстве Твоего последняго жребия на земли — Серафимо-Дивеевской

обители.

Радуйся, в день Благовещения посетившая его со Апостолом Иоанном и Предтечею, и двадцатью девами-мученицами, и возвестившая ему о скором преселении его в Небесные Обители;

Радуйся, благословившая при сем и смиренную монахиню Дивеевскую Евпраксию.

Радуйся, в дивных сониях являвшаяся святителю Кириллу Александрийскому, Петру Афонскому, Роману Сладкопевцу и многим иным святителем и преподобным;

Радуйся, сладким Твоим гласом, исходящим от Святых иконы Твоей Едесской, введенная во храм Алексия человека Божия.

Радуйся, таковым гласом наставившая на путь покаяния преподобную Марии Египетскую;

Радуйся, Пречистая Дева, всемирная Слава и Радость!

### **Кондак 12**

Благодать сугубую источаешь Ты, Пречистая, от иконы Твоей «Умиление» во обители Серафимо-Дивеевской пребывающей; пред Нею же избранник Божий и Твой, представитель Божий и Твой представитель за землю Русскую, преподобный Серафим денно и нощно молящеся Тебе, именуя Тя «Радостию всех радостей» и пой Тебе в пустыннем затворе своем песнь: «Всемирную славу от человек прозябшую». С ним же купно и мы восхваляем Тя, Пречистая Владычице, сими же словами, и приносим Богу Ангельское пение: Аллилуиа.

### **Икос 12**

Поюще Твоя неисчисльные милости, чудеса и явления, всему миру дарованныя Тобою, припадающе к Тебе во умилении сердца нашего, благодарим Тя, Пречистая Владычице, хвалим Тя, поем и превозносим имя Твое, и молим Тя, не отвержи и впредь от нас лица Твоего, заступи, защити и спаси всех нас во грехах погибающих: умири нашу жизнь, настави заблуждающихся на путь правый, воспитай в духе благочестия чад наших, укрепи наших пастырей, соблюди нас в чистой вере, да уста наша выну восхваляют Тя, Высшую Небес и Чистшую Светлостей солнечных, таковыми гласы:

Радуйся, Невесто неневестная и Царица цариц;

Радуйся, Небесный Кивоте и носило Слова Божия.

Радуйся, Горлице Богогласная и Голубице кроткая и тихая;

Радуйся, неизмеримое Глубино и неизреченная Тайна.

Радуйся, несведомое Чудо и Источниче святыни;

Радуйся, девствующих Чистото и матерей тихое Веселье.

Радуйся, младенцев Охранительнице и вдов Защито;

Радуйся, болящих Здравие и плленных Избавление.

Радуйся, труждающихся благое Покоище и ненадеющихся Надеяние;

Радуйся, Едина наша Надежда в жизни и по отшествии нашем от земли.

Радуйся, на мытарствах нас Защищающая и на страшном суде Христовом наша Заступница;

Радуйся, Пречистая Дева, всемирная Слава и Радость!

### **Кондак 13**

О, Пречистая Дево, Владычице небеси и земли! Приими от всея души нашея возносимое Тебе сие хвалебное пение и сподоби нас грешных в вечных селениях зretи Тя, нашу всемирную Славу и Радость всех радостей, поя Тебе и о Тебе Богу песнь великую, в Выших трегубо песнословимую: Аллилуиа.

### **Молитва Божией Матери**

О Пресвятая Дево, Мать Господа Вышняго, Заступнице и Покрове всех к Тебе прибегающих! Призри с высоты святыя Твоя на мя грешного, припадающего ко пречистому образу Твоему; услыши мою теплую молитву и принеси ю пред возлюбленного Сына Твоего, Господа нашего Иисуса Христа; умоли Его, да озарит мрачную душу мою светом Божественныя благодати Своей, да избавит мя от всякия нужды, скорби и болезни, да низпослет мне тихое и мирное житие, здравие телесное и душевное, да умирит страждущее сердце мое и исцелит раны его, да наставит мя на добрыя дела, ум мой от помышлений суетных да очистит, исполнению же заповедей Своих мя научив, от вечных муки да избавит и Своего Небеснаго Царствия да не лишит мя. О Пресвятая Богородице! Ты, Всех скорбящих Радосте, услыши и мя скорбного; Ты, именуемая Утоление печали, утоли и мою печаль; Ты, Купино Неопалимая, сохрани мир и всех нас от вредоносных огненных стрел врага; Ты, Взыскание погибших, не попусти и мне погибнуть в бездне грехов моих. На Тя бо по Бозе вся моя надежда и упование. Буди мне в жизни временней Заступницей и о жизни вечной пред возлюбленным Сыном Твоим, Господем нашим Иисусом Христом, Ходатаицей. Тебе же, Пресвятая Мати Божия, Преблагословенная Марие, благоговейно чтити до скончания дней моих. Аминь.